

Thursday, July 10, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

CM

New Delhi a cham mek Chief Minister Pu Lalduhoma chuan sawrkar laipua mi pawimawh hrang hrang hmu in Mizoram tana hmasawnna tur a sawi pui.

Pu Lalduhoma hian HRDS India hotute chu Mizoram House, New Delhi ah kawmin Mizorama mi harsa zawkte tana chenna in sak theih dan kawng an sawidun a, HRDS India hian Sadhgraha hmalakna kaltlangin tribal mipui, chenna in tha neilo te tana chenna in tur sak chu an pawl thiltum lian ber a ni a. Kum 2029 ral hma ngeiin India ram pumah tribal te tan chenna in nuai 100 din sak hman an tum a ni. HRDS hotute hian Mizoram chhungah zirchhianna an neihfel tawh thu leh Phase I atan chenna in 5000 vel sa tura hmalak an inpeih thu an sawi a. A tul angin a theihna zawnah hma a lo lakpui zel tur thu Chief Minister hian HRDS India hotute hi a hrilh a ni.

Chief Minister hian BSNL hotu Robert J Ravi chu Mizoram house ah kawmin India ram khawpui lian hrang hranga BSNL-in ram awl neihah MoU Mode a Mizoram House leh hostel sak dan tur a sawipui a, Mizoram Village Council tina Optic Fiber Drop-In siam chungchang te, mobile signal la awm that lohna khuaa 4G Tower din belh chungchang te pawh an sawidun a. Zirlai ten awlsam zawka online exam an kalpui theih nan BSNL chuan Mizorama an telephone exchange tinah online exam center din turin Chief Minister hian a hrilh a, Universal Services Obligation Fund kaltlanga Multi Tasking Telecom Technician te hnena training pe tura hma lak dun theih dan kawng te pawh an sawi dun a ni.

<><><>

MUHCS

Mizoram Universal Health Care System hnuaia IVF tih theihna empanelled hmasa ber, AM Medical Centre PVT.LTD chu Chanmari West Aizawlah mipui pan theih a hawn a ni.

He thu hi AM Medical Centre Director Kanad Maitra chuan vawiin khan Aizawl Press Club-a thuthar thehdarhtute hnenah sawiin, AM Medical Centre hmunpui chu Kolkata ah a awm tih sawiin, Kolkata a inenkawlina an chhawpchhuah chu hmarchhak mipuite tana chhawpchhuah sak ve turin huang an zauh mek a ti a.

Kumin May ni 20 atang khan Mizoram mipuite pan theih turin Chanmari West, Aizawlah AM Medical centre an din thar a ni tih sawiin Aizawla an centre ah ha lam enkawlina, Dental department bakah Mizorama ha CT scan tih theihna hmasa ber-CBCT te, vun lam enkawlina leh nau pai thei lo te tana nau pai tirna, IVF te pawh a tih theih a. Mizoramah MUHCS hnuaia IVF tih theihna empanelled hmasa ber an nih thu a sawi bawk.

Byte: AM Medical Centre Director Kanad Maitra

Aizawl AM Medical Centre a enkawlina hmanrua an neih loh avanga Kolkata a an centre pan tura an tih te chu an ei leh in bakah an thlenna tur thlengin a thlawna ruahman sak vek thin an nih thu a sawi bawk a ni.

<><><>

BJP PRESS CONFERENCE

BJP Mizoram chuan CADC Governor Rule puan chungchanga Home Minister Pu K. Sapdanga’n Larsap thutlukna demna thu a sawi chu Mizorama thil la thleng ngai lo a ni tih sawiin pawl antih thu a sawi.

Vawiina Aizawl Press Club a thuthar thehdarhtute an kawmnaah BJP National Minority Morcha Secretary Pu Delson Notlia, MDC chuan he thu hi sawiin, India Constitution Sixth Schedule hnuaia Autonomous District Council te chungah Larsap chuan thuneihna sang tak an nei a ti a. Chakma Autonomous District Council chu India rama Autonomous District Council 10 zingah a buai zing bik hle tih sawiin, CEM an thlak zin bakah eirukna leh sum indaih lohna a nasa hle a ti a. Mizoram Governor chuan CADC dinmun chu uluk taka a en hnua a enkawlina hnuaia awm tul a tih avangin India Constitution in thuneihna a pek angin Governor’s Rule ah thla 6 chhung a dah phawt a ni a ti a. Hemi chungchanga July ni 8 a Home Minister Pu K Sapdanga’n thuthar thehdarhtute kova, Governor thutlukna demna thu a sawi chu Mizorama thil la thleng ngai lo a ni a ti a. Home Minister in Governor thutlukna siam chu mipui rorelna palzutna ang nia a sawi te, Governor chu Politics a inbeihna atana a hman chu Mizoram BJP ten an dem thu a sawi a, tunhmaa MNF leh Congress sorkar lai pawhin Mizorama Governor lo awm tawh te chuan ADC te chungchangah thutlukna an lo siam fo tawh thin bakah Governor demna thu sawi chu Mizoramah a la thleng ngai lo anih thu a sawi bawk.

<><><>

CYMA AID

Central YMA chuan tunhnaia Myanmar ramchhung Chin Hills-a Zo hnahtlak unau inkara inhriatthiam lohna avanga Mizorama raltlante tan cheng nuai 6 man hu tanpuina a pe chhuak a, tuhnai ruahsur avanga hmun hrang hranga chhiat tawh te tan tanpuina cheng nuai 13 chuang a pe chhuak bawk.

Central YMA thuchhuah tarlan danin Zokhawthar Branch YMA hnenah cheng nuai 3 man hu eitur an pe a,Vaphai Branch YMA hnenah cheng nuai 2 man hu ei tur pe in Champhai Sub- Hqrs YMA hnenah cheng nuai 1 an hlan bawk.

Central YMA chuan tunhnaia ruah sur nasa avanga Mizoram hmun hrang hranga chhiattawk te tanpuina a sem chhuak a, Mitthi 5 hnenah cheng sing 3 sang 5 theuh pe in Leiminin a hnawl In chhe vek 28 te chu cheng sing 2 theuh an pe a, In thiah leh tlu chhe mai thei dinhmuna ding 51 te chu cheng sing 1 pe in Saichal YMA Library min leh Bungtlang West ‘YMA Run’ chhia chu cheng sing 3 sang 1 ve ve an pe bawk.

<><><>

PM MODI

Prime Minister Narendra Modi chuan tun hnai khan ram hrang hrang tlawhin hun a hmang a, Namibia-a a zinna ah inremna 2 ziakin Namibia a Entrepreneurship Develpoment Centre din chungchang leh Health and Medicine lam a thawhduna an ziaak a ni.

External Affairs Secretary (Eastern Region) Dammu Ravi chuan Prime Minister Narendra Modi leh Namibia President Netumbo Nandi Ndaitwah ten ram aiawh inbiakna an neih hian thil hrang hrang sawi dun in, ram 2 te tan thawhdunna bul tan thar na a ni tih a sawi.

<><><>